

武英殿聚珍版丛书

九

十

十一

十二

十三

十四

十五

十六

文恭集卷二十八

宋

胡

宿

撰

帖子詞

皇帝閣春帖子

案本集諸帖子各有五言體此亦宜有之殆爲傳寫缺佚

三元鳳歷當春始萬壽龍卮進御前綵勝朱幡宜此日
金枝玉葉慶新年

蒼玉新旂祀木神今朝太皞始司春農躔漸覺星辰正
壽歷長隨日月新

翦綵房中新勝出披香殿裏早春回祥雲更傍南山起

來對君王萬壽杯

苑中芳樹條風細
天上黃衢杲日遲
仙果定生千歲實
祥烟長護萬年枝

春官青鳥司開啟
星舍蒼龍主發生
甘雨惠風資帝力
杏花蒲葉勸民耕

玉殿香絲縈綵縷
金盆白雪間紅花
子孫千億無疆壽
盡逐東風入帝家

皇后閣春帖子

羲仲司暘谷塗山
佐夏王六宮師儉
德四海化躬桑

中禁千祥集東方萬象新綵幡迎喜氣寶字鏤宜春

東陸韶光先四序周南風化被羣芳資生萬物昭坤德
嘉慶千春集紫房

東風初入長春殿碧溜新融太液池社遠未當迎燕日
川晴先近浴蠶時

白綠仙雲雜紫雲長生靈氣護元君已膺虎劔司陰教
更珮金璫奏寶文

妃閣春帖子

日向陰虬永春隨綵鳳歸玉京多燕喜金殿滿光輝

宮中玉漏迎遲日天上珠躔麗次星軒頂聖圖光億載
皇英賢範奉千齡

音官始奏融風至御水初傳曉凍開寒漏催將仙臘盡
春旂飛入貴宮來

翦綵平明出藝房長生殿裏百花芳書銜燕子青春早
劒拂仙衣白日長

夫人閣春帖子

綠樹春芳滿仙蓂晝景長早花依玉砌初溜漾銀塘
浴種宜蠶事脩禡盡燕祠資生迎木正蕃衍納春祺

釀酒淳神水延年飲露華八風朝聖日三境住仙家
雪晴宮樹有新梅來報東郊淑氣回春令先從天上起
年芳初向日邊開

迎氣青幡獵曉風九門佳氣鬱葱葱日華初在搏桑上
春色先歸御柳中

皇帝閣端午帖子

南極注生氣音官協夏鈞良辰五日永景福四時新
曉霽澄天宇離明敞帝閣靈符千福集神印百邪奔
剛日逢端始炎辰屬長贏君王仁且聖慈旨卻梟羹

殿戶還颺入宮池御水涼綵舟人競渡化國日偏長
四時乘大德五日敞金屏陽晷移南陸天光盛紫微
商管微陰動良辰午正端三光扶聖壽億載奉皇歡
三殿茲辰奉御觴薰風梅雨好年光炎天更作奇峯勢
來表南山壽歷長

後宮鳬鳥將雛樂上苑安榴著子新嘉節已將天合數
明離還覩日重輪

南方炎帝本乘離長育羣生在此時命縷綵花傳故事
風光天上更相宜

南方朱鳥司時令東闕蒼龍護禁扉萬壽御觴端日舉
祥風三殿繞雲旂

九霄嘉節重端辰命縷靈符粲寶文虞舜無爲心自正
五絃琴上奏南薰

寶岐麥色黃雲重御苑榴花丹焰深已顯豐年資帝力
更憑佳節悅天心

皇后閣端午帖子

川館親蠶後宮房獻繭初香繒爭點畫綵縷競垂舒
棟葉迎新候菖花發美祥憂勤宣內則嘉宴助時陽

靈艾傳芳遠仙莫吐葉新配乾資厚德介祉集嘉辰
星火朱光熾繒絲采物華謹謠宜聖日王氣協皇家
紫禁端辰晝漏長朱陵生氣盛南方長秋此日司陰教
皇極同時納壽皇

壽觴百福融甘露寶索千祥鏤彩雲五日永逢佳令節
億年長奉睿明君

香爐角黍傳三楚丹篆靈符辟五兵更有龜臺仙藥在
河洲賢德保長生

靈苗遠採三山藥仙篆高飛六甲符此日萬神同翼衛

長秋洪算與乾俱

蕤賓干氣盛炎方坤德資生茂百昌西域葡萄初蔓衍
成周瓜瓞更綿長

楚粢雕盤九子香綵絲朱索更迎祥坤元此日扶皇極
偉兆先時協壽房

夫人閤端午帖子

五絲通遺問百草鬪輸贏神印能祛惡靈符解辟兵
天家饒物采華節有光輝明月裁歌扇輕霞翦舞衣
禁苑年光麗端辰物象華天風結桃實火德盛榴花

文苑集 卷二十八
蓮葉抽芳際榴房結子初長生鬪百草舊俗祭三閭
廣殿回雕輦滄池漾綵舟堯心順時令不是重嬉遊
魚龍曼衍夸宮戲湘慮浮沈銜水嬉齊上聖皇千萬壽
飄然仙樂在瑤池

故事順時羞角黍舊儀乘節浴蘭湯人間涼麥欣時豫
天上薰風愛日長

續命由來宜綵縷辟邪相向佩靈符夏鈞調樂長生酒
歲歲宮中祝聖圖

宮中應節垂金縷天上迎祥捧玉卮更奏開元羽衣曲

年年長願侍瑤池

彩艾相傳禳故氣香茅競愛結靈芳炎洲正覺仙遊盛
化國偏知日景長

上梁文

醴泉觀涵清殿上梁文

兒郎偉國家出神明之後濬發靈源受天人之歸勃興
炎歷軼夏商而拓迹介河洛以造邦混并八紘傳序四
葉皇帝紹祖功宗德之烈躬神武聖文之姿大明燭于
六幽至仁孚于羣品運陶甄而範俗丕變中和偃戈革

以靖民洽臻昭泰大秩百神之祀上躋三靈之休天瑞
格思坤珍至止眷言乃室粵在巽隅有龜蛇合體之精
顯水土北方之異蟠居息壤苾湧榮泉色華清以蕩邪
味甘飴而蠲疾祥聞神奧惠洽都人有悅宸心爰稽瑞
牒卽其爽塏峙厥靈祠嚴香火之薰脩極規模之壯麗
鬱攸弗戒豈冥數之有常建章乃營在舊文而可作集
班倅之巧匠飭荆楚之美材攷工程能庶民獻力天老
練其日策石申候其星經抗華殿以正基架脩梁而結
宇雄虹晨挂采翟朝飛聳層構以凌雲成新宮于不日

道旁盛于輿馬觀者同于堵牆飫賜之豐旣覃于微阜
驩謠之美敢采于游童且慶落成用陳善祝

兒郎偉拋梁東石橋觀日任施功三韓百濟歸封內方
丈蓬萊在日中

兒郎偉拋梁西青雲可上不須梯雪山葱嶺人無外宛
馬蒲桃路不迷

兒郎偉拋梁南赫赫王靈海外覃薰風養物深仁被鯁
壑無波至德涵

兒郎偉拋梁北天子威靈操斗極覃于攪酒奉驩盟潢

水占風朝有德

兒郎偉拋梁上路近銀河翻碧浪陽鳥戢翼過猶疑金
雀栖觚鎮相向

兒郎偉拋梁下鬱鬱祥氛徧朝野九龍于此護靈泉六
甲相將扶大廈

伏願拋梁以後帝圖益大天歷彌長區宇嘉靖歲物蕃
昌乾剛增九五之吉本支茂千億之祥惟威神之館御
佑鼎祚以無疆

集禧觀大殿上梁文

兒郎偉我國家席真祖之慶源受上穹之駿命誕膺炎
歷昭啟黃圖設都河洛之間廣朝萬寓建號房心之次
大撫八紘威稜震于鬼方聲文燁于海裔訖惟人面之
類達于王土之濱莫不重九譯以來庭執萬珍而入貢
奉昭華之玉琯獻弱水之神香如衆星之拱北辰若百
川之赴巨海三代土疆之制悉統京師五岳神靈之祠
並居封域欽屬先真之聖尊加帝者之居爰就國陽載
嚴館御奉真游而惟永歷年祀以彌長皇帝上聖難名
至人冠古纂睿圖于三后接遐武于九皇仁厚之風誕